

საჯარო სამართლის იურიდიული პირის – საქართველოს ინტელექტუალური
საკუთრების ეროვნული ცენტრის – საქპატენტის თავმჯდომარის

ბრძანება №02

2011 წლის 18 მარტი

„საქპატენტთან არსებული სააპელაციო პალატის დებულების“ დამტკიცების თაობაზე

„საქართველოს საპატენტო კანონის“ 8¹ მუხლისა და მე-9 მუხლის მე-2 პუნქტის შესაბამისად, ვბრძანებ:

1. დამტკიცდეს „საქპატენტთან არსებული სააპელაციო პალატის“ თანდართული დებულება.

2. ბრძანება ამოქმედდეს გამოქვეყნებისთანავე.

თავმჯდომარე ი. ღვალამე

საქპატენტთან არსებული სააპელაციო პალატის დებულება

მუხლი 1. ზოგადი დებულებები

1. ეს დებულება განსაზღვრავს საჯარო სამართლის იურიდიულ პირ – საქართველოს ინტელექტუალური საკუთრების ეროვნულ ცენტრთან – „საქპატენტთან“ – (შემდგომში – საქპატენტი) არსებული სააპელაციო პალატის (შემდგომში – სააპელაციო პალატა) ფუნქციებს, უფლებამოსილებებს, სტრუქტურას და საქმიანობასთან დაკავშირებულ სხვა საკითხებს.

2. სააპელაციო პალატა შექმნილია „საქართველოს საპატენტო კანონის“ მე-9 მუხლის საფუძველზე და წარმოადგენს საქპატენტთან არსებულ, ინტელექტუალური საკუთრების ობიექტებზე საქპატენტის მიერ მიღებულ გადაწყვეტილებებთან, ასევე მათი დაცვის კრიტერიუმებთან, პატენტის გაცემასთან და სამრეწველო საკუთრების სხვა ობიექტების რეგისტრაციასთან დაკავშირებული დავების განმხილველ ორგანოს.

3. სააპელაციო პალატა თავისი საქმიანობისას ხელმძღვანელობს საქართველოს კონსტიტუციით, საქართველოში მოქმედი საერთაშორისო ხელშეკრულებებითა და შეთანხმებებით, საქართველოს ზოგადი ადმინისტრაციული კოდექსით, ინტელექტუალური საკუთრების სფეროში მოქმედი საქართველოს კანონმდებლობით, სხვა საკანონმდებლო და კანონქვემდებარე ნორმატიული აქტებით და ამ დებულებით.

მუხლი 2. სააპელაციო პალატის შემადგენლობა

1. სააპელაციო პალატის თავმჯდომარეა საქპატენტის თავმჯდომარე.

2. სააპელაციო პალატის მდივნებს, იურიდიული დეპარტამენტის თანამშრომელთაგან ბრძანებით ნიშნავს სააპელაციო პალატის თავმჯდომარე. სააპელაციო პალატის მდივანი უზრუნველყოფს საქმისწარმოებასთან დაკავშირებული კორესპონდენციის, მათ შორის, სააპელაციო პალატის გადაწყვეტილებების, მხარეებთან გაგზავნას.

3. სააპელაციო პალატის კოლეგია (შემდგომში – კოლეგია) იქმნება თავმჯდომარის ბრძანებით, საქპატენტის თანამშრომელთაგან, სამი წევრის შემადგენლობით.

4. სააპელაციო პალატის თავმჯდომარე კოლეგიის წევრთაგან ნიშნავს კოლეგიის თავმჯდომარეს.

5. კოლეგიის ერთ-ერთი წევრი უნდა იყოს საქპატენტის იმ დეპარტამენტის თანამშრომელი, რომელ



ინტელექტუალური საკუთრების ობიექტსაც ეხება სააპელაციო საჩივარი, ხოლო მეორე წევრი – იურიდიული დეპარტამენტის თანამშრომელი;

6. თუ სააპელაციო საჩივრის განხილვასთან დაკავშირებული საკითხი მოითხოვს სპეციალურ ცოდნას, რომელსაც არსებითი მნიშვნელობა აქვს საქმის გადაწყვეტისათვის, კოლეგიის ინიციატივით ან მხარეთა დასაბუთებული შუამდგომლობის საფუძველზე, კოლეგია უფლებამოსილია საქმის განხილვის ნებისმიერ ეტაპზე მოიწვიოს ექსპერტი, რომელიც არ არის საქპატენტის თანამშრომელი.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 3. აცილების საფუძვლები

1. დაუშვებელია საქმის განხილვაში კოლეგიის იმ წევრის მონაწილეობა, რომელიც:

ა) ამ საქმეში თვითონ წარმოადგენს დაინტერესებულ მხარეს ან მას ამა თუ იმ დაინტერესებულ მხარესთან საერთო უფლებები ან ვალდებულებები აკავშირებს;

ბ) მონაწილეობდა განაცხადზე ექსპერტიზის ჩატარებაში ან/და გადაწყვეტილების მიღებაში;

გ) დაინტერესებული მხარის ან/და მისი წარმომადგენლის ნათესავია.

2. ამ მუხლის პირველი პუნქტით განსაზღვრული აცილების საფუძვლები ვრცელდება, აგრეთვე, სააპელაციო პალატის მდივანზე და ამ დებულების მე-2 მუხლის მე-6 პუნქტით გათვალისწინებულ მოწვეულ ექსპერტზე.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 4. თვითაცილება და დაინტერესებულ მხარეთა განცხადება აცილების შესახებ

1. აცილების საფუძვლების არსებობისას კოლეგიის წევრი/მდივანი ვალდებულია სააპელაციო პალატის თავმჯდომარეს წერილობით აცნობოს თვითაცილების შესახებ და მიუთითოს თვითაცილების საფუძველი.

2. კოლეგიის წევრის თვითაცილების შემთხვევაში, სააპელაციო პალატის თავმჯდომარე განიხილავს კოლეგიის წევრის თვითაცილების საკითხს და გამოსცემს ბრძანებას კოლეგიის ახალი შემადგენლობის დამტკიცების შესახებ, ხოლო მდივნის თვითაცილების შემთხვევაში, საქმის განხილვა გაგრძელდება სხვა მდივნის მონაწილეობით.

3. სააპელაციო საჩივრის განხილვაში მონაწილე დაინტერესებული მხარე, რომელიც მიიჩნევს, რომ არსებობს კოლეგიის წევრის/მდივნის, ამ დებულების მე-3 მუხლით განსაზღვრული აცილების საფუძველი, ვალდებულია აცილების შესახებ განცხადება წარადგინოს ადმინისტრაციული წარმოების დაწყებიდან ან იმ მომენტიდან ორი სამუშაო დღის ვადაში, როდესაც მისთვის ცნობილი გახდა აცილების საფუძველი.

4. კოლეგიის წევრის/მდივნის აცილების შესახებ საკითხს წყვეტს სააპელაციო პალატის თავმჯდომარე 5 სამუშაო დღის ვადაში.

5. თუ განცხადება მდივნის აცილების შესახებ დაკმაყოფილდა, საქმის განხილვა გაგრძელდება სხვა მდივნის მონაწილეობით.

6. თუ განცხადება კოლეგიის წევრის აცილების შესახებ დაკმაყოფილდა, ამ დებულებით განსაზღვრული წესით სააპელაციო პალატის თავმჯდომარე გამოსცემს ბრძანებას კოლეგიის ახალი შემადგენლობის დამტკიცების შესახებ და სააპელაციო პალატის სხდომა გადაიდება არაუმეტეს ორი კვირით.



მუხლი 5. საფასური

1. სააპელაციო პალატაში სააპელაციო საჩივრის შეტანისას გადაიხდება „ინტელექტუალური საკუთრების ობიექტების დაპატენტებასთან, რეგისტრაციასთან და დეპონირებასთან დაკავშირებული მომსახურების საფასურების დამტკიცების შესახებ“ საქართველოს მთავრობის 2010 წლის 3 ივლისის №182 დადგენილებით დამტკიცებული საფასური.

2. სააპელაციო საჩივრის განსახილველად მიღების შემდეგ, სააპელაციო საჩივრის განხილვისათვის გადახდილი საფასური დაბრუნებას არ ექვემდებარება, გარდა იმ შემთხვევისა, როდესაც განსახილველად მიღების შემდეგ სააპელაციო საჩივარი დაუშვებლად იქნება ცნობილი.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 6. სააპელაციო პალატაში გასაჩივრებისა და მიმართვის საფუძვლები

1. სააპელაციო პალატაში გასაჩივრების საფუძვლებია:

ა) საქართველოს საპატენტო კანონის 40³ მუხლის პირველ პუნქტში მითითებული საფუძველი;

ბ) „სასაქონლო ნიშნების შესახებ“ საქართველოს კანონის 15¹ მუხლის მე-7 პუნქტში, მე-16 მუხლის პირველ, მე-2 და მე-4 პუნქტებში, 38⁴ მუხლსა და 38⁶ მუხლის მე-3 პუნქტში მითითებული საფუძვლები;

გ) „დიზაინის შესახებ“ საქართველოს კანონის მე-20 მუხლის პირველ, მე-2 და მე-3 პუნქტებში მითითებული საფუძვლები;

დ) კანონმდებლობით გათვალისწინებული სხვა შემთხვევები.

2. (ამოღებულია - 04.09.2024, №7).

3. სააპელაციო პალატაში სააპელაციო საჩივრის შეტანა დასაშვებია შესაბამისი გადაწყვეტილების გამოქვეყნებიდან/ჩაბარებიდან 3 თვის ვადაში.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2024 წლის 4 სექტემბრის ბრძანება №7 - ვებგვერდი, 05.09.2024წ.

მუხლი 6¹. სააპელაციო საჩივრის წარდგენა

1. სააპელაციო პალატაში სააპელაციო საჩივრის წარდგენა ხდება მატერიალური ფორმით ან ელექტრონული სისტემის მეშვეობით.

2. სააპელაციო საჩივარი წარდგენილი უნდა იქნეს სააპელაციო პალატის თავმჯდომარის მიერ დამტკიცებული სააპელაციო საჩივრის ფორმით.



3. ელექტრონული ფორმით წარდგენისას, სააპელაციო საჩივარი შეტანილი უნდა იქნეს საქპატენტის ელექტრონული სისტემის (შემდგომ – ელექტრონული სისტემა) www.online.sakpatenti.gov.ge მეშვეობით.

4. სააპელაციო საჩივრის ელექტრონული ფორმით წარდგენისას, მხარეებთან კორესპონდენციის/ბრძანების/გადაწყვეტილების გაგზავნა ხდება საქპატენტის ელექტრონული სისტემის მეშვეობით. ბრძანება/გადაწყვეტილება/შეტყობინება ჩაბარებულად ითვლება ბრძანების/გადაწყვეტილების/შეტყობინების მიღების შესახებ შეტყობინების ელექტრონულ სისტემაში ასახვისთანავე.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 7. სააპელაციო საჩივრის განსახილველად მიღება და განხილვის ვადები

1. კოლეგია იხილავს სააპელაციო საჩივარს და გამოაქვს გადაწყვეტილება სააპელაციო საჩივრის შეტანის დღიდან 3 თვის ვადაში.

2. სააპელაციო საჩივარს წარდგენის დღესვე ენიჭება სპეციალური ნომერი.

3. სააპელაციო საჩივრის შეტანის თარიღად ითვლება მისი საქპატენტში წარდგენის თარიღი.

4. სააპელაციო საჩივრის შეტანის თარიღიდან 5 სამუშაო დღის ვადაში სააპელაციო პალატის თავმჯდომარე ქმნის კოლეგიას.

5. თუ სააპელაციო საჩივარი აკმაყოფილებს ამ დებულების 6¹ მუხლის მე-2 და მე-3 პუნქტების და მე-8 მუხლის მოთხოვნებს, კოლეგიას გამოაქვს გადაწყვეტილება სააპელაციო საჩივრის განსახილველად მიღების თაობაზე.

6. სააპელაციო საჩივრის ზეპირი მოსმენის თარიღი მხარეებს ეცნობებათ ზეპირი მოსმენის გამართვამდე არანაკლებ 7 კალენდარული დღით ადრე. საჭიროების შემთხვევაში, ზეპირი მოსმენა შესაძლებელია გაიმართოს ელექტრონული კომუნიკაციის საშუალებების გამოყენებით.

7. საერთაშორისო სასაქონლო ნიშნისათვის საქართველოში დაცვის მინიჭების შესახებ საქპატენტის გადაწყვეტილების გასაჩივრების შემთხვევაში, სააპელაციო საჩივრის განხილვისათვის დადგენილი სამთვიანი ვადის დენა ჩერდება, სააპელაციო საჩივრის განსახილველად მიღების შესახებ გადაწყვეტილების საფუძველზე, მიღებული წინასწარი გადაწყვეტილების ინტელექტუალური საკუთრების მსოფლიო ორგანიზაციის (ისმო) საერთაშორისო ბიუროში გაგზავნიდან ამავე გადაწყვეტილებით განსაზღვრული ვადის ამოწურვამდე ან დაინტერესებული მხარის მიერ პოზიციის წარმოდგენამდე, რომელიც უფრო ადრე დადგება.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 8. სააპელაციო საჩივრის შინაარსი და დასაშვებობა

1. სააპელაციო საჩივარი უნდა ეხებოდეს ინტელექტუალური საკუთრების ობიექტის მხოლოდ ერთ განაცხადს.

2. (ამოღებულია - 28.01.21, №1).

3. სააპელაციო საჩივარი უნდა შეიცავდეს:

ა) სააპელაციო პალატის სრულ დასახელებას;

ბ) სააპელაციო საჩივრის წარმდგენი პირის სახელს/სახელწოდებას და საკონტაქტო ინფორმაციას;



ბ¹) წარმომადგენლის (თუ სააპელაციო საჩივარი შეაქვს წარმომადგენელს), სახელს/სახელწოდებასა და საკონტაქტო ინფორმაციას;

გ) გასაჩივრებული აქტის დასახელებას, ნომერს და თარიღს;

დ) მითითებას იმის თაობაზე, თუ აქტის რა ნაწილია გასაჩივრებული;

ე) მითითებას, თუ რაში მდგომარეობს აქტის უსწორობა და კონკრეტულად რას მოითხოვს სააპელაციო საჩივრის შემტანი პირი;

ვ) გასაჩივრების სამართლებრივ საფუძვლებსა და გარემოებებს, რომლებსაც ეფუძნება მოთხოვნა;

ზ) სააპელაციო საჩივარზე თანდართული საბუთების ნუსხას და გვერდების რაოდენობას.

4. თუ სააპელაციო საჩივრის წარმდგენ პირს გადაეცა აქტი, რომელსაც ასაჩივრებს, სააპელაციო საჩივარს უნდა დაერთოს მისი ასლი.

5. სააპელაციო საჩივარი და თანდართული მასალები სააპელაციო პალატას წარედგინება იმდენ ეგზემპლარად, რამდენი მხარეც მონაწილეობს სააპელაციო საჩივრის განხილვაში.

6. სააპელაციო საჩივარს ხელს აწერს მისი წარმდგენი პირი.

7. თუ სააპელაციო საჩივარი შეაქვს წარმომადგენელს ან/და უფლებამონაცვლეს, სააპელაციო საჩივარს თან უნდა ერთოდეს მხარის წარმომადგენლობის ან/და უფლებამონაცვლეობის დამადასტურებელი საბუთი.

7¹. მხარის წარმომადგენლობის დამადასტურებელი დოკუმენტი (მინდობილობა) უნდა შეიცავდეს:

ა) მარწმუნებლის სახელს/სახელწოდებას, იურიდიულ მისამართს, პირად ნომერს/საიდენტიფიკაციო ნომერს, აგრეთვე, წარმომადგენლის (გარდა პატენტრწმუნებულისა) პირად ნომერს;

ბ) წარმომადგენლის (პატენტრწმუნებულის) უფლებამოსილების ფარგლებს;

გ) მინდობილობის შედგენის თარიღსა და ადგილს;

დ) მარწმუნებლის ხელმოწერას;

ე) მინდობილობის მოქმედების ვადას. თუ ვადა აღნიშნული არ არის, მინდობილობა ძალაშია მარწმუნებლის მიერ უფლებამოსილების შეწყვეტამდე.

7². მინდობილობა ფორმდება იმ ქვეყნის კანონმდებლობის შესაბამისად, სადაც ის არის შედგენილი.

8. სააპელაციო საჩივარს უნდა ახლდეს სააპელაციო საჩივრის განხილვისათვის დადგენილი საფასურის გადახდის დამადასტურებელი საბუთი.

8¹. სასაქონლო ნიშნის რეგისტრაციის შესახებ გადაწყვეტილების გასაჩივრებისას, თუ სააპელაციო საჩივარი წარდგენილია „სასაქონლო ნიშნების შესახებ“ საქართველოს კანონის მე-5 მუხლის „ა“-„ზ“ ქვეპუნქტების საფუძველზე, იგი უნდა შეიცავდეს მონაცემებს ყველა იმ ადრინდელი პრიორიტეტის მქონე რეგისტრირებულ სასაქონლო ნიშანზე, დიზაინზე, გეოგრაფიულ აღნიშვნასა და/ან ადგილწარმოშობის დასახელებაზე, ან ამ ობიექტების ადრინდელი პრიორიტეტის მქონე განაცხადებზე, რომლის საფუძველზეც წარდგენილია სააპელაციო საჩივარი.

8². „დიზაინის შესახებ“ საქართველოს კანონის მე-20 მუხლის 4¹ პუნქტით გათვალისწინებული მოთხოვნის თაობაზე შუამდგომლობის დაყენების შემთხვევაში, წარმოდგენილი უნდა იყოს დიზაინის გამოსახულება შეცვლილი ფორმით.

9. სააპელაციო საჩივარი არ არის დასაშვები, თუ:



ა) სააპელაციო საჩივარი არ არის წარდგენილი ამ დებულების მე-6 მუხლით გათვალისწინებული საფუძვლებით;

ბ) გასულია სააპელაციო საჩივრის წარდგენის დადგენილი ვადა;

გ) არსებობს სააპელაციო პალატის გადაწყვეტილება იმავე მხარეებს შორის, იმავე საგანზე და იმავე საფუძვლით;

დ) სააპელაციო საჩივარი შეიტანა პირმა, რომელიც სასამართლოს მიერ ცნობილია ქმედუვნაროდ;

ე) არსებობს სასამართლოს გადაწყვეტილება ან სასამართლო წარმოებაშია საქმე დავაზე იმავე მხარეებს შორის, იმავე საგანზე და იმავე საფუძვლით.

10. თუ სააპელაციო საჩივარი არ აკმაყოფილებს 6¹ მუხლის მე-2 პუნქტის და ამ მუხლის პირველი, მე-3 – 8¹ პუნქტებით გათვალისწინებულ მოთხოვნებს, კოლეგიას გამოაქვს გადაწყვეტილება სააპელაციო საჩივარზე ხარვეზის დადგენის თაობაზე და სააპელაციო საჩივრის წარმდგენ პირს განუსაზღვრავს ვადას ხარვეზის აღმოსაფხვრელად. თუ დადგენილ ვადაში ხარვეზი არ იქნება აღმოფხვრილი, კოლეგიას გამოაქვს გადაწყვეტილება სააპელაციო საჩივრის განუხილველად დატოვების შესახებ. ხარვეზის დადგენის შემთხვევაში დებულების მე-7 მუხლის პირველი პუნქტით განსაზღვრული ვადის დენა ჩერდება.

11. თუ აღმოიფხვრა ის გარემოება, რომელიც გახდა სააპელაციო საჩივრის განუხილველად დატოვების საფუძველი, მხარე უფლებამოსილია განმეორებით მიმართოს სააპელაციო პალატას ამ დებულების მე-6 მუხლის მე-3 პუნქტით განსაზღვრულ ვადაში.

12. თუ სააპელაციო საჩივარი არ აკმაყოფილებს ამ მუხლის მე-9 პუნქტით გათვალისწინებულ მოთხოვნებს, კოლეგიას გამოაქვს გადაწყვეტილება სააპელაციო საჩივრის დაუშვებლად ცნობის თაობაზე.

13. თუ არსებობს სააპელაციო საჩივარზე როგორც ხარვეზის დადგენის, ასევე საჩივრის დაუშვებლად ცნობის საფუძველი, კოლეგია იღებს გადაწყვეტილებას სააპელაციო საჩივრის დაუშვებლად ცნობის თაობაზე.

14. კოლეგიამ სააპელაციო საჩივრის განსახილველად მიღების, ხარვეზის დადგენის ან დაუშვებლად ცნობის თაობაზე გადაწყვეტილება უნდა მიიღოს კოლეგიის შექმნიდან 10 სამუშაო დღის განმავლობაში.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2025 წლის 25 დეკემბრის ბრძანება №17 - ვებგვერდი, 26.12.2025 წ.

მუხლი 8¹. კომერციული საიდუმლოება

1. სააპელაციო საჩივრის, შესაგებლის ან დამატებითი დოკუმენტაციის წარდგენისას პირი ვალდებულია მიუთითოს, რომ ეს ინფორმაცია წარმოადგენს მის კომერციულ საიდუმლოებას. სააპელაციო პალატის კოლეგია 15 სამუშაო დღის ვადაში იხილავს და იღებს გადაწყვეტილებას მითითებული ინფორმაციის კომერციულ საიდუმლოებად მიჩნევის თაობაზე, გარდა იმ შემთხვევისა, როცა ინფორმაციის ღიაობის ვალდებულება დადგენილია კანონით.

2. ინფორმაციის კომერციულ საიდუმლოებად არმიჩნევის შესახებ მიღებული გადაწყვეტილების გაცნობიდან 15 სამუშაო დღის შემდეგ ინფორმაცია ხდება ღია, თუ პირმა, რომლის საკუთრებაცაა ეს ინფორმაცია, ამ ვადის გასვლამდე კანონმდებლობით დადგენილი წესით სასამართლოში არ გაასაჩივრა ამ პუნქტით გათვალისწინებული გადაწყვეტილება. გადაწყვეტილების გასაჩივრების შესახებ პირმა დაუყოვნებლივ უნდა აცნობოს სააპელაციო პალატას.

3. ინფორმაციის კომერციულ საიდუმლოებად არმიჩნევის შესახებ გადაწყვეტილების სასამართლოში გასაჩივრება არ აჩერებს სააპელაციო საჩივრის განხილვას. სასამართლოს გადაწყვეტილების კანონიერ ძალაში შესვლამდე აღნიშნული ინფორმაციის შემცველი დოკუმენტაცია მესამე პირთათვის ხელმისაწვდომი შესაძლოა გახდეს დაფარული ფორმით.



მუხლი 9. განხილვის წესი

1. სააპელაციო საჩივართან დაკავშირებით მიღებულ გადაწყვეტილებებს: სააპელაციო პალატის კოლეგიის დანიშვნის შესახებ, სააპელაციო საჩივარზე ხარვეზის დადგენის შესახებ, სააპელაციო საჩივრის განსახილველად მიღების შესახებ, სააპელაციო საჩივრის დაუშვებლად ცნობის შესახებ, სააპელაციო საჩივრის განუხილველად დატოვების შესახებ, სააპელაციო პალატის მდივანი უგზავნის აპელანტს ან მის წარმომადგენელს.

2. კოლეგიის მიერ სააპელაციო საჩივრის განსახილველად მიღების შემდეგ, სააპელაციო პალატის მდივანი, სააპელაციო საჩივრისა და მასზე თანდართული მასალების, აგრეთვე, სააპელაციო საჩივრის განსახილველად მიღების შესახებ გადაწყვეტილების ასლს უგზავნის დაინტერესებულ მხარეს.

3. დაინტერესებული მხარე უფლებამოსილია სააპელაციო პალატას წარუდგინოს შესაგებელი, მატერიალური ფორმით ან ელექტრონული სისტემის მეშვეობით, სააპელაციო საჩივრის ასლის ჩაბარებიდან 10 კალენდარული დღის ვადაში. შესაგებელი წარდგენილ უნდა იქნეს იმდენ ეგზემპლარად, რამდენი მხარეც მონაწილეობს სააპელაციო საჩივრის განხილვაში, გარდა იმ შემთხვევისა, როდესაც შესაგებლის წარდგენა ხდება ელექტრონული სისტემის მეშვეობით. შესაგებელი წარდგენილ უნდა იქნეს სააპელაციო პალატის თავმჯდომარის მიერ დამტკიცებული ფორმით.

4. აპელანტს უფლება აქვს უარი თქვას სააპელაციო საჩივარზე საჩივართან დაკავშირებით საბოლოო გადაწყვეტილების მიღებამდე.

5. სააპელაციო პალატა საქმისწარმოებას წარმართავს ქართულ ენაზე.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 10. დაინტერესებულ მხარეთა მიერ დამატებითი ინფორმაციის წარდგენა და ახალ გარემოებებზე მითითება

1. დაინტერესებული მხარე საქმესთან დაკავშირებულ დამატებით დოკუმენტებს წარადგენს ზეპირი მოსმენის გამართვამდე არა უგვიანეს 5 სამუშაო დღისა.

2. დაუშვებელია კოლეგიის მიერ დამატებითი ინფორმაციის მოთხოვნა, ან დაინტერესებულ მხარეთა მიერ მისი წარდგენა, თუ ის შეიცავს ახალ გარემოებებს და ამით სცილდება აპელაციის ფარგლებს.

3. თუ წარდგენილ იქნება დამატებითი ინფორმაცია, რომელიც არ სცილდება აპელაციის საგანს, ზეპირი მოსმენა შესაძლოა გადაიდოს გონივრული ვადით.

4. დაინტერესებული მხარეების მიერ დამატებითი ინფორმაცია წარდგენილ უნდა იქნეს იმდენ ეგზემპლარად, რამდენი მხარეც მონაწილეობს საქმეში.

მუხლი 11. ზეპირი მოსმენის გადადება

1. დაინტერესებულ მხარეთა დასაბუთებული შუამდგომლობის საფუძველზე ან კოლეგიის ინიციატივით შესაძლებელია ზეპირი მოსმენის გადადება გონივრული ვადით, რის შესახებაც ეცნობებათ დაინტერესებულ მხარეებს.



2. ამ მუხლის პირველი პუნქტით გათვალისწინებულ შემთხვევაში მე-7 მუხლის პირველი პუნქტით გათვალისწინებული ვადის დენა ჩერდება.

მუხლი 12. სააპელაციო საჩივარზე საქმისწარმოების შეჩერება

1. კოლეგია უფლებამოსილია მხარის დასაბუთებული შუამდგომლობის საფუძველზე ან საკუთარი ინიციატივით შეაჩეროს საქმის განხილვა, თუ გამოვლინდა ისეთი გარემოება, რომელმაც შესაძლოა გავლენა მოახდინოს განსახილველი საქმის შედეგზე.

2. კოლეგია ვალდებულია დაინტერესებული მხარის განცხადების საფუძველზე ან საკუთარი ინიციატივით, საქმისწარმოების შეჩერების საფუძვლის აღმოფხვრისთანავე განაახლოს საქმისწარმოება.

3. ამ მუხლის პირველი პუნქტით გათვალისწინებულ შემთხვევაში მე-7 მუხლის პირველი პუნქტით გათვალისწინებული ვადის დენა ჩერდება.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 13. კოლეგიის სხდომა

1. კოლეგიის სხდომას თავმჯდომარეობს კოლეგიის თავმჯდომარე;

2. თავმჯდომარე ხსნის სხდომას და აცხადებს, თუ რომელი საქმე იქნება განხილული;

3. თავმჯდომარე მხარეებს წარუდგენს კოლეგიის შემადგენლობას, სხდომის მდივანს და განუმარტავს მათ აცილების უფლების შესახებ;

4. თავმჯდომარე მოკლედ გადმოსცემს საჩივრის შინაარსს და შესაგებელში მითითებულ ძირითად გარემოებებს;

5. თავმჯდომარე ვალდებულია უზრუნველყოს საქმისათვის მნიშვნელობის მქონე გარემოებათა გამოკვლევა ზეპირ მოსმენაზე და დამსწრე დაინტერესებულ მხარეს მისცეს საქმესთან დაკავშირებით საკუთარი აზრის გამოთქმის უფლება.

6. მხარეთა ან მესამე პირთა ახსნა-განმარტების მოსმენის შემდეგ, კოლეგია მხარის შუამდგომლობით ან საკუთარი ინიციატივით განიხილავს და ამოწმებს სადავო მტკიცებულებებს.

7. თუ ზეპირი მოსმენის დასრულების შემდეგ, კოლეგიის მიერ გადაწყვეტილების მიღებამდე გამოვლინდა საქმისათვის არსებითი მნიშვნელობის მქონე ახალი გარემოება, აღნიშნული უნდა ეცნობოს დაინტერესებულ მხარეს და მიეცეს საკუთარი მოსაზრების წარდგენის შესაძლებლობა. კოლეგია უფლებამოსილია ახლად გამოვლენილი გარემოება განიხილოს ზეპირი მოსმენით.

8. სხდომა ზეპირ მოსმენასთან დაკავშირებით საჯაროა. მხარის დასაბუთებული შუამდგომლობის საფუძველზე, სხდომის თავმჯდომარე უფლებამოსილია სხდომა დახურულად გამოაცხადოს პერსონალური მონაცემების, სახელმწიფო, კომერციული ან პროფესიული საიდუმლოების დაცვის უზრუნველყოფის მიზნით.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 14. ზეპირი მოსმენის სხდომის ოქმი



1. სააპელაციო საჩივრის განხილვასთან დაკავშირებით გამართული ზეპირი მოსმენის სხდომის მიმდინარეობა აისახება აუდიოჩანაწერში, რომლის ჩაწერას ტექნიკური საშუალების გამოყენებით უზრუნველყოფს სხდომის მდივანი.

2. ზეპირი მოსმენის სხდომის ოქმის ჩანაწერის გამოთხოვის შემთხვევაში, დაინტერესებულ პირს გადაეცემა შესაბამისი აუდიოჩანაწერი ელექტრონული ფორმით – აუდიოდისკის სახით.

3. დაინტერესებული მხარის მოთხოვნის შემთხვევაში დასაშვებია ოქმის გაცემა წერილობითი ფორმით, მოთხოვნის წარდგენიდან 5 სამუშაო დღის ვადაში.

4. ოქმის წერილობითი ფორმით გაცემისას, ოქმს უნდა დაესვას სააპელაციო პალატის ბეჭედი.

5. წერილობითი ფორმით გაცემულ ოქმში მიეთითება:

ა) სააპელაციო საჩივრის დასახელება, სააპელაციო საჩივრის სპეციალური საიდენტიფიკაციო ნომერი, რომლის თაობაზეც ეწყობა განხილვა;

ბ) განხილვის დრო და ადგილი;

გ) კოლეგიის თავმჯდომარის, წევრებისა და სხდომაზე დამსწრე პირთა ვინაობა;

დ) დავის საგანი, განხილვაში მონაწილე პირთა ახსნა-განმარტების მოკლე აღწერა.

6. ამ მუხლის მე-3 პუნქტის საფუძველზე გაგზავნილ ოქმზე დაინტერესებულ მხარეს უფლება აქვს წარადგინოს შენიშვნები ოქმის ჩაბარებიდან 3 სამუშაო დღის ვადაში. თუ კოლეგია ეთანხმება შენიშვნას, ადასტურებს მის სისწორეს და ასახავს ოქმში, ხოლო თუ არ ეთანხმება გამოაქვს გადაწყვეტილება შენიშვნის უარყოფის შესახებ.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

მუხლი 15. გადაწყვეტილება და მისი ძალაში შესვლა

1. კოლეგია საქმის არსებითად განხილვის შედეგად იღებს შემდეგი სახის გადაწყვეტილებებს:

ა) სააპელაციო საჩივრის დაკმაყოფილების შესახებ;

ბ) სააპელაციო საჩივრის ნაწილობრივი დაკმაყოფილების შესახებ;

გ) სააპელაციო საჩივრის დაკმაყოფილებაზე უარის თქმის შესახებ.

2. კოლეგია გადაწყვეტილებას იღებს ხმათა უმრავლესობით, მხარეთა დაუსწრებლად;

3. კოლეგიის გადაწყვეტილებას ხელს აწერენ კოლეგიის წევრები;

4. კოლეგიის წევრს, რომელიც არ ეთანხმება უმრავლესობას, შეუძლია წერილობით ჩამოაყალიბოს თავისი განსხვავებული აზრი. განსხვავებული აზრი დაერთვის გადაწყვეტილებას;

5. კოლეგიის გადაწყვეტილებაში მიეთითება სააპელაციო საჩივრის შემოსვლის დროს საჩივრისათვის მინიჭებული საიდენტიფიკაციო ნომერი;

6. კოლეგიის გადაწყვეტილება ფორმდება სპეციალურ ბლანკზე და მას დაესმება ბეჭედი;

7. სააპელაციო პალატის ბლანკისა და ბეჭდის ფორმას ამტკიცებს სააპელაციო პალატის თავმჯდომარე;



8. საქმის არსებითად განხილვის შედეგად კოლეგიის მიერ მიღებულ გადაწყვეტილებას ბრძანებით ამტკიცებს სააპელაციო პალატის თავმჯდომარე;

9. კოლეგიის გადაწყვეტილება სააპელაციო პალატის თავმჯდომარის ბრძანებასთან ერთად გასაჩივრდება საქართველოს კანონმდებლობით დადგენილი წესის შესაბამისად სასამართლოში კოლეგიის გადაწყვეტილებისა და სააპელაციო პალატის თავმჯდომარის ბრძანების გაცნობიდან/ჩაბარებიდან ერთი თვის განმავლობაში.

მუხლი 16. დებულებაში ცვლილებებისა და დამატებების შეტანის წესი

დებულებაში ცვლილებების და დამატებების შეტანა ხორციელდება საქპატენტის თავმჯდომარის ბრძანებით, საქართველოს კანონმდებლობით დადგენილი წესის შესაბამისად.

მუხლი 17. გარდამავალი დებულებები

1. 2020 წლის 10 ოქტომბრამდე სააპელაციო პალატაში განხილულ საქმეთა შესახებ მესამე პირების მიერ ინფორმაციის/დოკუმენტაციის გამოთხოვისას, სააპელაციო პალატის კოლეგია, ინფორმაციის კომერციულ საიდუმლოებად მიჩნევასთან დაკავშირებით, ადმინისტრაციულ წარმოებაში ჩართავს შესაბამის დაინტერესებულ პირს/პირებს და ინფორმაციის კომერციულ საიდუმლოებად მიჩნევის თაობაზე იმსჯელებს ⁸¹ მუხლით განსაზღვრული წესით.

2. ამ დებულების ამოქმედებამდე განხილულ სააპელაციო საჩივრებთან დაკავშირებით ოქმის გაცემა ხდება ამ დებულების მე-14 მუხლით გათვალისწინებული წესის შესაბამისად.

საჯარო სამართლის იურიდიული პირის – საქართველოს ინტელექტუალური საკუთრების ეროვნული ცენტრის – საქპატენტის თავმჯდომარის 2021 წლის 28 იანვრის ბრძანება №1 - ვებგვერდი, 01.02.2021 წ.

